

DAGING CAKEPAN AWIG-AWIG

Murdha Citta.....	ii
Daging Cakepan Awig-Awig.....	iii
Sarga I. Aran Lan Wewidangan Désa Pakraman	1
Sarga II. Dasar Lan Tetujon.....	2
Sarga III. Sukerta Tata Krama.....	2
Palet 1. Indik Krama	2
Palet 2. Indik Prajuru.....	7
Palet 3. Indik Samuhan	9
Palet 4. Indik Kulkul.....	11
Palet 5. Indik Laba Pura Lan Druén Désa	12
Palet 6. Sukerta Pamitegep	13
Kaping1. Indik Karang Lan Tegal.....	13
Kaping2. Indik Tanem Tuuh.....	14
Kaping3. Indik Wewalungan.....	14
Kaping4. Indik Wewangunan.....	15
Kaping5. Indik Baya Miwah Dusta	15
Kaping6. Indik Panyanggra Désa Utawi Banjar	16
Sarga IV. Sukerta Tata Agama.....	16
Palet 1. Indik Déwa Yajnya.....	16
Palet 2. Indik Resi Yajnya	20
Palet 3. Indik Pitra Yajnya.....	24
Palet 4. Indik Manusa Yajnya	25
Palet 5. Indik Buta Yajnya	26
Sarga V. Sukerta Tata Pawongan	27
Palet 1. Indik Pawiwahan.....	27
Palet 2. Indik Palas Marabian	31
Palet 3. Indik Balu.....	32
Palet 4. Indik Sentana.....	33
Palet 5. Indik Waris	34

Sarga VI. Wicara Lan Pamidanda	36
Palet 1. Indik Wicara	36
Palet 2. Indik Pamidanda	36
Palet 3. Indik Pamargin Pamidanda	37
Palet 4. Indik Rerampagan	38
Sarga VII. Pasuara, Sima Utawi Pararem.....	38
Sarga VIII. Nguwah Nguwuhin Awig-Awig	39
Sarga IX. Raja Brana Druén Désa.....	39
Sarga X. Pamuput.....	40
Angga Prawartaka Panyurat	42

SARGA I

ARAN LAN WEWIDANGAN DÉSA PAKRAMAN

Pawos 1

1. Désa Pakraman puniki mawasta Désa Pakraman Manggissari.
2. Jebar payar wewidangan mawates nyatur luihé :
 - ha. Sisi wétan, Désa Pakraman Juwuk Manis.
 - na. Sisi kidul, Désa Pakraman Asah Durén.
 - ca. Sisi kulon, alas tutupan utawi hutan negara.
 - ra. Sisi lor, Désa Pakraman Munduk Tengah, Kabupatén Buléléng.
3. Wewidangan Désa Pakraman Manggissari kepah dados 2 (kalih) banjar pakraman, luih ipun :
 - ha. Banjar Pakraman Manggissari.
 - na. Banjar Pakraman Bunut Bolong.
4. Wewidangan banjar pakraman punika manut paruman banjar kepah dados témpék utawi arahan manut pararem.

Pawos 2

1. Manut tri mandalaning désa pakraman, yéning inargamayang sakadi anggasarira, kanten sakadi:
 - ha. Utama Mandala : sahanan parhyangan désa rauhing tegaknyané pinaka sirah désa pakraman.
 - na. Madya Mandala : pupulan karang paumahan, tegal, margi utawi rurung, tenten, tukad lan tlajakan pinaka awak désa pakraman.
 - ca. Nista Mandala : sétra utawi tunon pinaka sukun désa pakraman.

Pawos 3

1. Banjar pakraman miwah sahanan sekaa-sekaa wenang ngardi pasuara utawi pararem maka pamikukuh awig-awig désa pakraman.
2. Pasuara utawi pararem sané munggah ring angka 1 (siki) pawos puniki tan wenang lémpas ring daging awig-awig désa pakraman.

- na. Krama tan ngarep.
- 3. Sajaba sané kasurat ring angka kalih pawos puniki, kasinanggeh tamiu.
- 4. Paindikan Krama kategesang sajangkepnyané ring pararem.

Pawos 6

- 1. Soang-soang warga désa utawi banjar sané sampun bulu angkep patut ngawit tedun dados krama désa utawi krama banjar pakraman.
- 2. Krama inucap patut keni ayah, sakadi :
 - ha. Ayah ngarep sapelaken utawi lanang wadu.
 - na. Ayah balu utawi ayah pangelé wiadin balu lanang utawi wadon, yaning madrué putra lanang wiadin wadu sané sampun mabasa wirang, keni ayah jangkep.

Pawos 7

- 1. Pawilangan ngawit dados krama désa utawi banjar adat sakadi ring sor :
 - ha. Ngawit mapaumahan wiadin sangkaning ngrereh pangupa jiwa ring wewidangan palemahan désa pakraman Manggissari.
 - na. Sangkaning sampun marabian tur maupakara biakala, sesuén-suénnyané tigang sasih.
 - ca. Sang sané mawali malih makrama sasampun naur pamogpog manut pararem.
 - ra. Kangsinanggeh tamiu sané sampun jenek 6 (nem) sasih magenah ring désa pakraman manggissari kapatutang tedun makrama tur naur pamogpog manut pararem.
- 2. Krama Désa keni ayah miwah tetegenan sakadi ring sor :
 - ha. Ayah ngarep, keni pepeson jangkep utawi gegem.
 - na. Ayah balu, keni pepeson utawi paon-paonan.
- 3. Luput saking ayah mamata-matu miwah pakenan-kenan inggih punika :
 - ha. Sang Sadaka utawi Para Sulinggih.
 - na. Para Pamangku Kahyangan Désa, Pamangku Kahyangan Subak lan Tapakan Pura.
 - ca. Para prajuru.
 - ra. Krama sané sampun werda.

- ka. Krama sané cé dangga banget.
 - da. Krama sakit tahunan, buduh muah ayan.
4. Désa muah banjar taler mapaweweh pepuangkidan ngayah, yéning sinalih tunggil krama katibén pakéwéh, luih ipun :
- ha. Nglaksanayang pancayajnya.
 - na. Matepetin kulawarga sungkan werat.
 - ca. Ritatkala sungkan.
 - ra. Lelungaan mabuat.
 - ka. Ngamargiang geginan jagat.
 - da. Cuntaka utawi kasebelan.
 - ta. Muah sané sios-siosan manut pararem.

Pawos 8

1. Tedun makrama kalih ngétang pasalin ayahan, nangken paruman désa utawi banjar manut dudonan.
2. Tedun makrama, pepalihan sakadi mungguh ring sor puniki :
 - ha. Kulawarga sané sampun kaunggahang ring kitab cacah jiwa adat, patut:
 - (1). Ten keni panugtug kas désa miwah banjar adat kawastanin nyelosin.
 - (2). Ten polih karang désa sajaba yéning wénten sakadi pawos 9 (sia) ha, na awig-awig puniki.
 - (3). Ten keni ayahan lan pepeson reramon masué tigang odalan ngawit katerag manut pararem.
 - na. Kulawarga saking dura désa sané durung kaunggahang ring kitab cacah jiwa adat patut :
 - (1). Makta utawi muat ilikita tegap manut pasuaraning jagat minakadi KTP (Kartu Tanda Penduduk) muah ilikita siosan.
 - (2). Nugtug kas désa utawi banjar adat.
 - (3). Ten polih karang désa utawi banjar.

- (4). Satinut ring awig-awig muah pararem désa utawi banjar.
- (5). Sampun madrué garapan utawi pakaryan sané pastika.
 - ca. Sajeroning sangkepan désa utawi banjar, kelihan désa utawi banjar patut ngwantu nyacah jiwa, ngétangang kalih mastikayang pakraman miwah ayah-ayahan ring wewidangan soang-soang.
4. Kapastikaan cacah jiwa pamekas indik pakraman miwah ayah-ayahan kapikukuhin antuk pamutus paruman désa utawi banjar soang-soang.
5. Kapastikaan inucap digelis kasurat ring ilikita désa utawi banjar.

Pawos 9

1. Sinali7h tunggil krama wusan makrama pradé :
 - ha. Saking pinunas ngraga pacang magingsir linggih.
 - na. Kanorayang antuk tan tinut ring sapatuduh prajuru, indik pacang nyupat raga ngeséhin salah prawertiné, tur tan polih pasayuban kasukertan.
 - ca. Pamidanda nganorayang inucap ring ajeng patut katur ring sang mawang rat.
 - ra. Tetiwakan pamidanda norané olih prajuru désa utawi banjar saha kadulurin antuk bukti lan saksi ngeninin indik kaiwangannia.
 - ka. Karang désa lan sesakapan patut kacabut tur mawantun ka désa.
 - da. Saluir wicara, utang piutang ring désa utawi banjar, patut katinasang manut agung alit utang piutangnia.
2. Wusan makrama, tan polih pah-pahan druén désa utawi banjar.
3. Krama sané sampun naenin polih karang désa, tan dados nunas utawi ngrereh karang désa malih.

Pawos 10

1. Swadharmaning krama désa utawi banjar, sios ring keni ayah-ayah, patut :
 - ha. Dreda lan bakti ring désa utawi banjar, tinut saturut ring sadaging awig-awig, pasuara utawi pararem désa utawi banjar.

- na. Ten mari ngutsahayang mangda molihang tetujon sakadi mungguh ring ajeng.
 - ca. Nyanggra suka kalawan duka saking kértin désa utawi banjar.
2. Swadharmaning krama sané kasinanggeh tamiu, patut :
- ha. Tinut lan saturut ring sadaging awig-awig, pasuara, pararem muah geguét-geguét désa utawi banjar pakraman, ngeninin indik ngupadi kasukertan sekala.
 - na. Ten wénten nungkasin sapamargin kértin désa utawi banjar pakraman.
3. Krama désa sané nrima tamiu jantos marerepan, bilih-bilih jantos pitung rahina, patut :
- ha. Nguningayang ring prajuru désa utawi banjar manut dudonan.
 - na. Prajuru patut maritatas tamiu inucap, saha nuréksa manut dresta tur kasurat ring ilikita.
 - ca. Krama sané ngajak patut niténin tamiu inucap, pradé sumendéa patut pramangkin atur uninga ring prajuru dumogi digelis kaicén pamutus.
4. Pradé tamiu lumaksana tan manut ring dresta désané minakadi duresila, duracara, patut kapitetehin ring krama sané ngajak.
5. Sang mamurug pawos puniki patut kadanda *manut pararem*.

Pawos 11

1. Sahanan krama désa rauhing sang kasinanggeh tamiu, wenang polih pasayuban ngeninin indik ngamanggehang kasukertan raga, agama miwah padruénnya soang-soang.
2. Sahanan warga désa wenang polih pangayom prajuru manut dresta ngeninin:
 - ha. Sangaskaraning kauripannya sané mabuat, sané mastikayang iketan sulur pakulawargan.
 - na. Kasukertan miwah kasucian déwék utawi raga, parhyangan miwah karangnya.
 - ca. Kasukertan druénnya soang-soang.
 - ra. Kabawosin tur katiwakin pamutus sahanan wicarania.

Palet 2

INDIK PRAJURU

Pawos 12

1. Kasinanggeh prajuru adat ring désa pakraman utawi banjar adat, inggih punika :
 - ha. Bendésa Pakraman : maka panua désa pakraman.
 - na. Kelihan Adat : maka panua banjar pakraman.
 - ca. Patajuh : maka wakil bendésa utawi wakil Kelihan Adat.
 - ra. Panyarikan : maka juru surat désa utawi banjar pakraman.
 - ka. Patengen : maka pangemong miwah ngélingang rajabrana druén désa utawi banjar pakraman.
 - da. Pamijian : maka juru pamargi désa utawi banjar pakraman.
 - ta. Kelihan Témpek : maka panua témpek utawi arahan.
2. Bendésa Pakraman lan Kelihan Adat muah Kelihan Témpek kacatri utawi kapilih olih paruman désa lan banjar miwah témpek manut dudonan.
3. Prajuru sané siosan sakadi inucap ring ajeng kasudi olih Bendésa utawi Kelihan Adat miwah Kelihan Témpek.
4. Sahanan prajuru patut mawiwit saking krama ayah ngarep tur sampun polih cecumponan saking krama désa utawi banjar pakraman.

Pawos 13

1. Prajuru kaadegang nangken 5 (limang) warsa tur kéngin kapilih malih, nanging tan kéngin langkung ring kalih pamilihan.
2. Sang kapilih inucap patut kaatur uningayang utawi kapajatiang ring kahyangan tiga désa tur kasinangaskara.
3. Prajuru adat inucap, inggian désa kapingkalih banjar muah témpek-témpek kéngin tur patut kagentosin yadiastun waneng ipun sakadi ring ajeng ngwates pradé dane :
 - ha. Lampus.
 - na. Ninggal kadaton.

- ca. Lumaksana duresila.
- ra. Wusan dados krama adat.
- ka. Lémpas ring swadharmaning prajuru adat.

Pawos 14

1. Swadharmaning prajuru désa kaping kalih banjar adat miwah témpék, inggih punika :
 - ha. Ngénterang sapamargin miwah panglaksana sadaging awig-awig, sima, lan pararem désa kaping kalih banjar adat.
 - na. Nuntun tur ngénterang krama ngupadi petitis lan kasukertan désa kaping kalih banjar adat sekala muah niskala.
 - ca. Ngangganin désa utawi banjar adat ngamiletin paruman wiadin ngwéntenang bebawos ring sapasira ugi manut swadharma soang-soang.
 - ra. Pamargi lan panglaksana prajuru désa kalih banjar adat muah témpék sakadi ring ajeng, patut kasinahang utawi kadartayang ring paruman désa utawi banjar miwah témpék kapungkur ipun.
2. Tetuas prajuru adat désa utawi banjar utawi témpék, inggih punika :
 - ha. Luput saking ayahan désa utawi banjar utawi témpék.
 - na. Luput saking ayahan subak wiadin dinas manut pasilih-asihan utawi paslisihan.
 - ca. Luput saking pakenan-kenan désa banjar utawi témpék manut pararem.
 - ra. Ulih-ulihan 10 (dasa) persen saking upon-upon tanah pacatu.
3. Olih-olihan prajuru siosan manut pararem désa utawi banjar.

Pawos 15

1. Swadharma lan kawenangan Bendésa saha Kelihan Adat, inggih punika :
 - ha. Nuntun tur ngénterang samuhan prajuru utawi samuhan paruman pamucuk, miwah samuhan-samuhan désa utawi banjar.
 - na. Ngénterang pamargin miwah panglaksana sadaging awig-awig lan pararem désa utawi banjar.

- ca. Ngénterang tata carané nganggé saraja-brana druén désa utawi banjar.
 - ra. Nuntun saha nyaksinin tata cara miwah sangaskaraning kauripané mabuat, minakadi mastikayang sulur pakulawangan krama.
 - ka. Nuntun saha ngénterang krama ngupadi nginggilang agama, kasucian pawongan utawi palemahan miwah tata caraning nganggé sétra utawi tunon.
 - da. Mawosin kaping kalih niwakang pamutus marep ring wicara krama désa utawi banjar.
2. Swadharmaning lan kawenangan prajuru adat sané siosan wantah nyanggra utawi nyratinin Bendésa utawi Kelihan adat.

Palet 3

INDIK SAMUHAN

Pawos 16

1. Parikrama pasamuhan adat luiré :
- ha. Samuhan krama désa adat.
 - na. Samuhan krama banjar adat.
 - ca. Samuhan krama témpék utawi sekaa-sekaa.
 - ra. Samuhan prajuru désa utawi banjar adat.
 - ka. Samuhan paruman pamucuk.
 - (1). Sahanan pasamuhan prasida lumaksana yéning sampun katedunin antuk sang patut ngamiletin bilih langkung ring atenga kéh ipun.
 - (2). Sahanan pamutus kautsahayang malarapan antuk kayun raksa-rumaksa, saling asah, saling asih, saling asuh; bilih tan prasida, wawu suara makéhan sinanggeh pamutus.
 - (3). Ring sahanan pasamuhan adat tan mari kariinin antuk ngarcana ring Ida Bhagawan Panyarikan, pamekas Ida Hyang Widhi, saha upakara sapatutnyané tur kalanturang antuk Puja Tri Sandhya.
2. Sajeroning pasamuhan adat, krama sané ngamiletin pasamuhan inucap kapatutang mabusana adat manut tetujon.

Pawos 17

1. Pasamuhan krama désa patut kawéntenang manut pararem désa.
2. Nangken pasamuhan krama désa ring ajeng, Bendésa Pakraman patut myaktayang pamarginnya indik ngénterang désané, pamekas ngeninin indik :
 - ha. Munjuk lungsur pakraman miwah ayah-ayahan.
 - na. Panelas miwah wibhawa utawi arta-brana sané kagamel.
 - ca. Pamargin désa sané mabuat.
 - ka. Sahanan wicara saha pamutusnya.
 - da. Daging awig-awig, miwah pararem sané mabuat.
 - ta. Miwah sané sios-siosan.
3. Sajaba kadi munggah ring ajeng, pasamuhan désa utawi banjar patut taler kawéntenang pradé kawerdi olih krama désa, sakirang-kirangnyané atenga langkung.
4. Sang ngwerdi patut mastikayang sané sandang bawosang ring pasamuhan inucap.
5. Pasamuhan désa kadi ring ajeng patut taler katiwakin pamutus.

Pawos 18

1. Pasamuhan prajuru désané patut taler kawéntenang sanistané asasih apisan.
2. Pasamuhan inucap katuntun antuk Bendésa Pakraman.
3. Sahanan prajuru adat patut ngamiletin pasamuhan inucap.
4. Pasamuhan prajuru désa pakraman kawenangannya wantah ngrincikang tata upaya nglaksanayang usaha muah pangrencana sakaluiré.
 - ha. Sahanan rerancangan bilih-bilih rencana pararemé sané pacang niwakang tetegenan ring krama.
 - na. Tan wenang kalaksanayang sadurung kapikukuhin antuk pamutus pararem krama désa utawi banjar pakraman.
5. Pamutus pararem wantah kasinanggeh pangwisésa tan kawicarayang malih.

Palet 4

INDIK KULKUL

Pawos 19

1. Désa miwah banjar pakraman kapatutang madrué piranti kulkul.
2. Kulkul désa miwah banjar tan wenang katepak yan tan manut kadi daging awig-awig.
3. Tabuh tetengeran kulkul désa muah banjar, pastika masiosan manut tetujon, luiré :
 - ha. Tengeran upakara yajnya désa utawi banjar "tungting-tungting".
 - na. Tengeran sinalih tunggil krama désa sané kalayuan utawi séda "duang tuludan saha begbeg lantang".
 - ca. Tengeran ngawit makarya utawi sané sampun kasiarang utawi kaarahang "atuludan lantang".
 - ra. Tengeran wénten krama kaplegandang, kamalingan, kaamuk, kabégalan, kabaak miwah baya pati siosan "bulus tur lantang".

Pawos 20

1. Kulkul désa miwah banjar tan wenang katepak, yan tan sangkaning patuduh Kelihan Désa utawi Banjar manut dudonan, sajawaning rikala ngwéntenang tengeran ngeninin indik kapancabaya, kadi munggah ring pawos 19 angka 3 (tiga) ra.
2. Sang mamurug wenang kadanda manut pararem désa utawi banjar.
3. Sahanan kulkul désa utawi banjar sawewidangan Désa Manggissari, patut nyarengin katepak pradé wénten sinalih tunggil kulkul désa utawi banjar sané nyihnayang wénten kapancabayaan, tur katedunin olih krama, saha muat gegawan mapitulung nganutin ring rupan baya.
4. Kulkul sekaa-sekaa tan wenang katepak nyarengin suaran kulkul désa utawi banjar inucap.

Palet 5

INDIK LABA PURA LAN DRUÉN DÉSA

Pawos 21

1. Sahanan laba pura désa utawi banjar sawengkoning Désa Pakraman Manggissari, sakadi munggah ring lepitan I (siki) awig-awig puniki.
2. Sahanan tanah tlajakan utawi tegak pura Désa Pakraman Manggissari sakadi munggah ring lepitan II (kalih) awig-awig puniki.
3. Sahanan karang désa utawi banjar désa pakraman Manggissari sakadi munggah ring lepitan III (tiga) awig-awig puniki.
4. Tanah sétra Désa Pakraman Manggissari sakadi munggah ring lepitan IV (papat) awig-awig puniki.
5. Kahyangan sané kapakandelin tur kasiwi olih krama désa luihé :
 - ha. Pura Puseh, Pura Désa lan Balé Agung, saha catus pata.
 - na. Pura Dalem lan Mrajapati.
 - ca. Pura Pujangga Sakti.
 - ra. Pura Pingit.
6. Kahyangan sané kapakandelin tur kasiwi olih krama subak, inggih punika :
 - ha. Pura Pucaksari, subak Manggissari.
 - na. Pura Gunung Maha Merta, subak Bunut Bolong.
7. Piranti-piranti drué désa muah banjar inggih punika :
 - ha. Balé Désa, Kantor Bendésa.
 - na. Balé Banjar miwah kulkul ring soang-soang banjar.
 - ca. LPD.
 - ra. Sétra.
8. Lelanguan patut kautsahayang antuk krama désa utawi banjar, minakadi :
 - ha. Gong, Angklung, Gendér miwah sané siosan manut kabuatan tur wiguna.
 - na. Ilén-ilén nangken pujawali ring pura, utaman iipun : rejang, péndét, baris gedé, kidung, miwah sané siosan.

9. Sajeroning ngamargayang pailén upacara-upakara yajnya kapatutang kaater antuk lelangan sakadi munggah ring angka 8 (kutus) pawos puniki.
10. Saluir upon-upon utawi olih-oli palaba, tlajakan-tlajakan pura miwah sané siosan patut kaanggén prabéa piodalan ring kahyangan-kahyangan désa utawi banjar manut dudonan miwah wiguna.

Palet 6

SUKERTA PAMITEGEP

Kaping 1

INDIK KARANG LAN TEGAL

Pawos 22

1. Sahanan karang lan tegal patut kapikukuhin antuk wates sané pastika, tur nyatur, macihna antuk témbok, pagehan, rurung utawi margi, tur sané marep kamargi utawi pamedal soang-soang mangda kanten asri saha madaging sanggah lebu manut dresta.
2. Wates sané sisi kalér utawi kangin kakaryanin antuk sang madrué karang inucap.
3. Pradé wénten karang sané kabebeng, mangda kakaryanang margi antuk sang madrué saha katuntun olih prajuru manut dudonan.
4. Karang désa dados kaadol, sakéwanten sang sané numbas mangda tedun makrama tur tinut ring daging awig-awig Désa Pakraman Manggissari.
5. Sané ngamolihang karang désa mangda kawangunin tur kalinggihin.
6. Wates karang sané majepitan, patut kategen olih krama sané mauluan kawatesin manut dresta.
7. Taru miwah upon-upon sané maurip ring ajeng, kadrué olih krama sané negen inucap.
8. Prajuruné patut ngutsahayang mangda karang kadi ring ajeng, katepasin tur kaicén pamutus.
9. Krama sané mamurug patut kadanda manut pararem.

Kaping 2

INDIK TANEM TUUH

Pawos 23

1. Tanem tuuh, wewangunan sakaluiré miwah tata carané nganggé karang tan wenang naonin miwah ngranayang pocol utawi ngletehin karang panyanding.
2. Pradé wénten mamurug, wenang kasepat-gantungin tur kadanda manut pararem.
3. Tanem tuuh sané mabaya ring panyanding, panyepat-gantungé wenang adepa agung ngajerowang saking wates.

Kaping 3

INDIK WEWALUNGAN

Pawos 24

1. Krama sané madrué sahananing wewalungan, patut sayaga negul utawi nglogorin, mangda wewalungan inucap tan ngrusak karang utawi abian krama siosan, bilih-bilih mangda tan jantos ngranjing ngletehin kahyangan.
2. Pradé wénten wewalungan ngeléb, saha ngranjing kapakarangan krama siosan, krama sané madrué karang patut mlungguhang ring krama sané madrué wewalungan inucap.
3. Pradé jantos ping tiga sampun kaplungguhang wewalungan wenang kataban, indiké asapunika patut atur uningang ring Kelihan Banjar.
4. Wewalungan tetabanan inucap wenang katebus olih krama sané madrué. Agung alit panebusané, manut ring ageng alit karusakan sané kawetuang, maweweh 10 (dasa) persén saking pamidanda karusakan inucap.
5. Pradé jantos ping tiga kataban, wewalungan inucap wenang kaambil tan wenang malih katebus, tur kalélang olih Kelihan Banjar. Jinah lélangan inucap kasukserahang ring krama sané madrué karang sané karusak, pradé wénten sisannya, dados druén désa utawi banjar manut dudonan.
6. Pradé wewalungan sané ngeléb inucap ngranjing kaparhyangan, krama sané madrué, wenang kasisipang antuk danda prabéaning upakara pamarisuda manut dresta.

Kaping 4

INDIK WEWANGUNAN

Pawos 25

1. Krama sané ngwangun, patut :
 - ha. Masadok ring prajuru, ping ajeng pradé wewangunan ngeninin wates.
 - na. Nganggé asta bhumi miwah gegulak asta kosala-kosali, sanistannyané macihna wewangunan (tradisional) Bali.
 - ca. Tan nyayubin ka pisaga, utawi druén krama sané tiosan.
 - ra. Tan dados ngembahang toya ka pisaga, utawi genah krama sané tiosan.
2. Pradé wewangunan jantos ngayubin bilih-bilih témboké ring telenging wates, risampun kawara tur kasadokang ring prajuru, wenang kadanda manut pararem, saha témbok inucap kagubar utawi sanistané mangda kakaryanang abangan.

Kaping 5

INDIK BAYA MIWAH DUSTA

Pawos 26

1. Sinalih tunggil krama désa utawi banjar pradé uning ring kawéntenan jadma malaksana corah utawi dusta, patut digelis (pramangkin) atur uninga ring prajuru.
2. Krama masadok sané patut, wenang kaayomin olih désa pakraman, yéning pasadoké nénten patut utawi mapisuna, krama sané mapisadok patut kakeninin pamidanda manut pararem.
3. Kasinanggeh lumaksana corah utawi dusta, bacakannia luihé :
 - ha. Jiwa baya.
 - na. Arta baya.
 - ca. Geni baya.
 - ra. Mlegandang.
 - ka. Duracara ring agama.
 - da. Miwah baya siosan

4. Bilih-bilih mabuat kawéntenan ipun, sang uning inucap patut digelis nywarayang kulkul banjar manut ring rupan bayané, kadi munggah ring pawos 19 (siangolas), angka 3 (tiga) ra.

Kaping 6

INDIK PANYANGGRA DÉSA UTAWI BANJAR

Pawos 27

1. Pakaryan sinalih tunggil krama sané mabuat, tata panyanggrané kasukserah ring banjar soang-soang manut dudonan.
2. Banjar wenang ngardi awig-awig sané ngamanggehang tatacara nyanggra pakaryan banjar.
3. Daging awig-awig punika patut madarsana antuk arsa paramatulung ring krama sané makarya, nanging tan maren miteketang kasujatian krama banjar.
4. Pradé karya dahat bobot, krama banjar wenang ngrereh panampih ring banjar siosan.
5. Pakaryan sané kasukserahang ring panyanggra banjar, luih ipun :
 - ha. Ngupakara sawa utawi pitra yajnya yadiastun tan pasawa.
 - na. Déwa yajnya, manusa yajnya, resi yajnya, miwah buta yajnya sané mabuat, manut pararem désa utawi banjar.
6. Sajaba kadi munggah ring ajeng, taler sakaluiring karya sané mabuat, kéngin kasukserah ring banjar, manut pararem.

SARGA IV

SUKERTA TATA AGAMA

Palet 1

INDIK DÉWA YAJNYA

Pawos 28

1. Kahyangan sané wénten ring Désa Manggissari, tigang soroh kawéntenannyané, luihé:
 - ha. Panyiwian désa utawi banjar.
 - na. Panyiwian subak.
 - ca. Panyiwian pamaksan.

2. Kahyangan panyiwian désa utawi banjar saha subak, kadi sané kasurat ring pawos 21 (selikur) angka 5 (lima) lan 6 (nenem) awig-awig puniki.
3. Mungguing pujawali utawi piodalan ring kahyangan kadi inucap ring ajeng inggih punika :
 - ha. Kahyangan sané magenah ring banjar pakraman Bunut Bolong :
 - (1). Pura Pujangga Sakti, rahina Anggara Kliwon wuku Julungwangi.
 - (2). Pura Gunung Maha Mertha, rahina Soma Pon,wuku Sinta.
 - (3). Pura Dalem, rahina Anggara Kliwon wuku Medangsia.
 - na. Kahyangan sané magenah ring Banjar Pakraman Manggissari :
 - (1). Pura Puseh lan Balé Agung, rahina Anggara Kliwon wuku Tambir.
 - (2). Pura Pucak Sari, rahina Soma Umanis wuku Tolu.
 - (3). Pura Pingit, rahina Buda Wagé wuku Klawu.

Pawos 29

1. Soang-soang kahyangan patut wénten pamangkunyané.
2. Pamargin wibuh kincit utawi agung-alit piodalan ring kahyangan inucap ring ajeng, minakadi :
 - ha. Kahyangan sané durung puput kaupakara antuk ngenteg linggih, piodalan wantah apadatengan, saha tan kéngin ngamanisin, caru ékasata.
 - na. Kahyangan sané sampun puput kaupakara antuk ngenteg linggih tur sampun mapraraga utawi pratima, upakara piodalan luihé :
 - (1). Alit, mapulagémbal saha caru.
 - (2). Madya, mabebangkit saha caru.
 - (3). Utama, nyatur ritatkala tegak wali utawi piodalan nemu Purnama utawi Tilem saha caru.

Pawos 30

1. Sinangken dasa (10) warsa apisan, patut kawéntenang ngusaba désa lan ngusaba nini, tur kéngin kalaksanayang sapisanan.
2. Sajeroning pangusaban, krama désa kapatutang ngaturang sarin tahun ring pura inucap.

3. Sinangken masa apisan ring Tilem sasih Kanem patut ngwéntenang aci "nangluk-mrana" katepining segara, tan maren ngupasaksiang ring kahyangan désa, tur kamanggala antuk prajuru désa.
4. Sinangken masa apisan ring Tilem sasih Karo patut ngwéntenang aci pacaruan ring sétra.
5. Sinangken aci Ida Betara Turun Kabéh patut kasanggra olih krama désa.

Pawos 31

1. Tata sukertaning krama utawi pawongan ritatkala ngranjing ka pura muah kahyangan patut :
 - ha. Sajawaning pamangku, prajuru miwah juru sapuh, yéning ngranjing ka pura patut masadok ring prajuru manut dudonan.
 - na. Pradé sampun anut ring dresta miwah tetujon kabuatané, prajuru patut niténin krama inucap, sapunapi pangaptiné.
 - ca. Pradé sampun sinah pangaptiné, sakéwanten tan malarapan manah utawi kayun adharma miwah durmenggala saha sampun tegep tata busana, wawu krama inucap kadadosang ngranjing ka pura utawi kahyangan.
2. Ngeninin tata busana kaétang kadi ring sor puniki :
 - ha. Rikala ayah lanang muah istri sajeroning ngadegang upakara, krama désa mangda mabusana adat, sanistané, mawastra, makwaca tur nganggé kampil utawi senteng lan destar.
 - na. Rikala Ida Betara sampun katuran pujawali, krama mangda nganggé busana tegep risampun munggah deha utawi teruna.
 - ca. Prajuru sané ngénterang indik sapamargin yajnya patut mabusana tegep manut dudonan.
3. Sané kabawos busana tegep sajeroning awig-awig puniki, kasurat ring pararem.

Pawos 32

1. Prajuru désa utawi banjar patut nuntun ngénterang krama utawi pakandel utawi panyiwinnya ngamanggehang kasucian parhyangan utawi pura utawi palinggih manut Dewa Widhi Tatwa utawi sastra agama.
2. Sajeroning ngamanggehang kasucian parhyangan utawi pura, sajeroning sang sinanggeh letuh utawi cendala kajeroning prahyangan inggih punika :

- ha. Krama luh sebel-kandel, minakadi; ngraja swala, karuron, madrué oka durung a bulan pitung dina, lan sapanunggalan ipun manut sengker.
 - na. Sahanan krama sadurung kasinangaskara yéning kapatita minakadi; pianak bebinjat, krama béling kasanggaman, krama mamitra ngalang, lan sakit ila miwah buduh lan sapanunggalan ipun.
 - ca. Krama sané kapastikayang panten manut pararem.
 - ra. Krama cuntaka utawi sebel antuk kapademan manut sengker.
3. Kahyangan utawi pura kasinaggeh keni durmanggala luih ipun :
- ha. Sané kawetuang olih aab jagat, luih ipun : karubuhan taru ageng, sander kilap, puun, karusakang angin nglinus, karusakang gejeran linuh, katabrak utawi ulungin motor, keni embidan utawi embid.
 - na. Wacakan sané kawetuang olih jadmajadma luih ipun : manyonyoin, kamalingan, jadmajadma nyraya utawi mayoga sané tan kauningin sangkaning nénten masadok ring prajuru, ngembasang raré, jadmajadma mapi-mapi karauhan, jadmajadma sané mapanganggé letuh minakadi wiwitan panganggé sawa, jadmajadma malalung utawi ngeséhin wastra ring pura, nyemuh panganggé raga-raga.
 - ca. Wacakan sané kawetuang saking beburon minakadi : beburon utawi ubuh-ubuhan sané mabatis 4 (papat) ngranjing kapura, minakadi : celeng, sampi, kebo, kambing, jaran, asu masaki, guak makta bebangkaan, lulut; tios ring asu lan buron sané kanggé upakara.
 - ra. Sahanan sané kasinaggeh letuh manut sastra agama minakadi; tulang, rah, lan sakaluring wiwitan watang utawi wangké, layudan pitrayajnya miwah sahanan letuh sané siosan.
 - ka. Wak parusiya minakadi mamisuh lan sané siosan sabacakan punika.
 - da. Majaljal utawi magerengan miwah masiat bilih-bilih jantos kanin metu rah.
 - ta. Mekoratan, mawarih, masanggama miwah laksana kawon siwosan.
4. Sapasira ugi mamurug kadi kasurat ring pawos puniki wenang kadanda manut pararem.

Pawos 33

1. Krama sané uning utawi manggihin mungguing wénten sané ngletehin kahyangan kadi mungguh ring ajeng patut digelis atur uninga ring prajuru manut dudonan.
2. Pasadok inucap mangda kasarengin antuk bukti, saksi lan ilikita.
3. Pradé tan kasadokang, wenang kasisipang, sinanggeh saéloan ring corah, sang asapunika patut kadanda manut pararem.

Pawos 34

1. Kahyangan-kahyangan pamaksan siosan, tatané ngastitiang kasuciania, patut saéloan ring kahyangan désa, sajawaning sané kariinan wantah madrué dresta siosan.
2. Yén tan anut kadi ucap pawos puniki, pralingga-pralingga kahyangan inucap tan kalugra kasarengang rikala samuha nyejer ring Balé Agung kalaning ngasanga, pangusaban miwah upakara siosan.

Palet 2

INDIK RESI YAJNYA

Pawos 35

1. Sang pacang mapodgala utawi madwijati utawi madiksa, sajawaning nunas panugrahan ring Parisada Hindu Dharma utawi sang mawangrat taler patut masadok ring Kelihan Banjar miwah Kelihan Désa Bendésa Pakraman.
2. Prajuru désa patut sareng nuréksa, niténin sulur kalih pamarginé jati-jati, manut tan manut ring kecaping agama, sané patut katuréksa pinih ajeng cédangga miwah kasucian kahuripannyané.
3. Pradé wénten sinanggeh kantun kamer, prajuru patut atur uning ring Parisada Hindu Dharma utawi sang mawangrat, mangda panugrahan punika sida jati-jati manut ring kecaping agama.
4. Sapuput upacara lan upakara padiksan, prajuru patut digelis ngutsahayang mangda parab sang diniksa kasurat ring ilikita, tur kagentos biséka kawikon manut panugrahan nabénia saha kabiaktayang ring pasamuhan désa utawi banjar.

5. Upacara lan upakara padiksan miwah nglinggihang pujané kapungkur patut kaupasaksi olih désa utawi banjar.

Pawos 36

1. Prajuru patut nuntun saha ngemanggalain krama niténin sapemargin para wikune ring wewidangania, pemekas mikukuhin kasucian linggih Ida.
2. Prajuru pemekas Kelihan Désa utawi Bendésa Pakraman patut digelis atur uninga ring nabénia, pradé wénten kacihnan wiku sasar ring laksana.
3. Atur piuning ring ajeng patut malarapan tur kadulurin cihna manut tri pramana utawi bukti, saksi lan ilikita.
4. Daging pamutus bawos sané katiwakang antuk nabénia digelis kabiaktayang ring pasamuhan désa muah banjar.
5. Pradé pamutus tetiwakané ring ajeng durung sida tatas apadang, prajuru atur upéksa ring Parisada Hindu Dharma miwah sang mawangrat.
6. Pamutus tetiwak nabé sané sampun kasanggra antuk rumaos inucap, kasinanggeh pamutus pastika ten kawicarayang malih.
7. Prajuru tan wenang lumaksana matetiwak ring sang wiku.

Pawos 37

1. Sang pacang mawinten wiadin mapodgala, maka buatan pacang mamargi ngamangkunin, nyonténg, kabayan, dalang sakaluir pacang ngénterang yajnya, patut masadok riin ring Kelihan Banjar utawi Kelihan Désa.
2. Prajuru inucap patut ngawas niténin mangda pamarginé manut ring kecap miwah dresta.
3. Prajuru désa wenang ngalangin pradé kacihnan sasar kekecap utawi dresta muah tan anut ring indik kawikon ring ajeng.
4. Sang tan terima ring tetiwak prajuru inucap dados nunas pamatut ring Parisada Hindu Dharma miwah sang mawangrat.

5. Pamutus bawos sané katiwakang ring ajeng, sinanggeh pamutus; pastika nénten kawicarayang malih.
6. Prajuru désa patut sareng nyaksinin upacara pawintenan inucap sapuputé tur digelis kabiaktayang ring pasamuhan banjar muah désa tegep rauhing wates kawenangan nganter yajnya sané dados kamargiang manut panugrahan dang guru utawi drestania soang-soang.
7. Krama Désa sami patut sareng ngawas niténin katuntun olih prajuru mangda sahanan yajnya sané kawéntenang kaicén pamatut olih pandita lan sujana utawi pamangku sakeluiré manut dudonan saha dresta.
8. Pradé wénten nglémpasin bilih-bilih sané pastika nyumuka, prajuru wenang ngalangin utawi ngurungang yajnya inucap, pradé katlanjur, punika kasinanggeh yajnya nirguna.
9. Sang nglémpasin utawi dustannyané patut katiwakin pamidanda manut pararem.
10. Pradé sang katiwakin tan manut ring pamutus inucap, wenang nunas bawos ring sang rumawos.

Pawos 38

1. Pamangku kahyangan désa sané kaadegang patut nganutin sulur miwah pararem sakadi dudonan ring sor puniki :
 - ha. Kasudi olih krama.
 - na. Ngwilang saking turunan.
 - ca. Nyanjan utawi nunas pawuwus Ida Sang Hyang Widhi, yaning mabuat mangda sang kaseliran kapintonin antuk aci pamintonan.
2. Pamangku kahyangan désa inucap kasinangaskara utawi kawintenang olih désa utawi banjar manut sakadi kasurat ring pararem.
3. Yéning pamangku kahyangan palatra, layon nyané tan kéngin kapendem, patut kageseng tur kaupakara olih désa antuk upakara nganutin daging pararem.
4. Pamangku kahyangan subak, tapakan, kasinangaskara utawi kawintenang olih pangempon, saha yan palatra layonnyané tan kéngin kapendem, patut kageseng tur kaupakara olih pangempon.

Pawos 39

1. Sané patut kamanggehang utawi kaadegang pamangku luihé :
 - ha. Nénten cédangga.
 - na. Nénten kageringan luihé : sakit ila, ayan, buduh lan sapenunggalan ipun.
 - ca. Nénten anyasar laku saluir sané munggah ring bacakan brahmacorah.
 - ra. Sané sampun marabi tur tan buta aksara sajaba sané malarapan antuk nyanjan kadi ring ajeng.
2. Pamangku kawusan saking nganutin pamutus samuhan utawi pararem pradé sampun janten lémpas ring tata kramaning kapamangkuan manut sastra agama.

Pawos 40

1. Swadharmaning Pamangku :
 - ha. Ngantebang upakara saluir aci-aci ring pura utawi kahyangan désa muah banjar subak abian miwah ring krama.
 - na. Ngantebang saluir aci-aci miwah panauran krama désa utawi dura désa.
 - ca. Niténin nuntun kasucian kahyangan miwah krama désa lan agama.
2. Sang mapanauran ring kahyangan patut masadok ring prajuru désa utawi banjar mangda sané patut katur puniané ring kahyangan janten pah-pahania, sareng pamangku luihé; lelues, wewalén, arta-brana, sesari, wewalungan suku pat wiadin suku kalih, pala bungkah, pala gantung sané patut kadrué olih désa.
3. Sajawaning panauran sakadi munggah ring ajeng minakadi aturan muah punia sané lumrah katunas miwah kapiserah ring pamangku.
4. Patuas pamangku luihé :
 - ha. Dasar suci ritatkala aci-aci ring kahyangan.
 - na. Arta daksina panganteb ritatkala wénten sang mapanauran.
 - ca. Pala kiwa guling ritatkala wénten sang mapanauran madaging guling.
 - ra. Miwah sané siosan manut pamuput tetimbang bebawos prajuru désa.
5. Krama désa kapatutang mapawéh punia ring pamangku ritatkala nglaksanayang yajnya manut wibuh-kincit utawi ageng alit yajnya inucap.

Palet 3

INDIK PITRA YAJNYA

Pawos 41

1. Krama sané pacang nganggé tunon / sétra patut nunas pamutus ring prajuru désa pamekas ring bendésa pakraman saha tatacara nganggé mangda manut sakadi dresta miwah pituduh prajuru.
2. Krama désa patut niténin mangda sahananing leteh sétra tan wénten nglalah kabakta ka désa pakraman bilih-bilih ka kahyangan-kahyangan.
3. Yaning wénten mendem, ngahgah, ngabén, saking dura désa patut kakeninin pananjung batu manut pararem.
4. Sang mendem sawa tan kawenangang makarya gegumuk mabeton.

Pawos 42

1. Krama sané pacang atiwa-tiwa patut polih pamutus saking Kelihan Adat / Bendésa Adat.
2. Kelihan Adat / Bendésa Adat niténin tur nuntun mangda yajnya punika nénten nyantulin kasukertan désa pamekas nénten ngletehin kasucian désa utawi kahyangan.
3. Pakaryan atiwa-tiwa utawi ngupakara sawa patut kapiserah ring banjar adat.
4. Banjar sayaga nyanggra utawi nguwéhin pamutus manut awig-awig.

Pawos 43

1. Padem salah pati, ngulah pati, kasinanggeh padem bener (mati biasa).
2. Yéning tamiu padem ring sawewengkon Désa Pakraman Manggissari patut polih wantuan banjar, sang ngajak patut polih wantuan suka duka nanging sang ngajak keni jinah pananjung batu manut pararem.

Pawos 44

1. Raré padem tan keni upakara tur tan ngétang déwasa yéning raré sané padem punika mayusa saking wawu embas nyantos tigang sasih.

2. Yéning raré sané padem punika mayusa lintangan ring tigang sasih ngantos sadurung ketus untu patut kaupakara nglungah.
3. Yéning sampun ketus untu kaupakara ngabén.

Pawos 45

1. Ten kawenangang mendem sawa / layon sakadi kasurat ring pararem.
2. Ten kéngin mendem sawa / layon sios ring sétra.

Pawos 46

Sang madué kasédaan patut polih patus manut pararem.

Palet 4

INDIK MANUSA YAJNYA

Pawos 47

1. Manusa yajnya inggih punika sinangaskara manusa ngawit saking patemoning purusa kalawan pradana utawi sukla swanita (kama petak kalawan kama bang) kantos sajeroning kantun maurip, yén tan samangkana kasinaggeh ngletehin désa.
2. Pawiwahan manut upacara-upakara adat Hindu tan kéngin kalaksanayang yan tan wong inucap maagama Hindu.
3. Pakaryan manusa yajnya sané patut kapiserah ring banjar, luih ipun :
 - ha. Masakapan.
 - na. Matatah.
 - ca. Meras sentana.
 - ra. Miwah sané siosan manut pararem.

Palet 5

INDIK BUTA YAJNYA

Pawos 48

1. Buta yajnya inggih punika upacara-upakara banten pabiakalan (palaba) miwah pacaruan sarwa prani ring ibu pertiwi ring kahyangan utawi pura, ring manusa muwah ring bebutan luié :
 - ha. Sarwa tumuuh utawi tanem tuuh.
 - na. Sarwa ingon-ingonan.
 - ca. Lelandep sarwa besi.
 - ra. Gambelan.
 - ka. Wewalian miwah balih-balihan.
2. Pakaryan buta yajnya sané dados kasanggra antuk banjar utawi désa, inggih punika: buta yajnya sané kalaksanayang olih sinalihtunggil krama ngawit saking Resi Gana ngamungganghang.
3. Buta yajnya jagat utawi désa utawi banjar, patut kasanggra antuk désa utawi banjar
4. Sanangken warsa ring Tileming Caitra (Kasanga) ring catus pata kawéntenang tawur Kasanga (Ngrupuk), nyoréang utawi wengi krama désa utawi banjar mabuu-buu (maobor-obor) nyanggra pagentosan Isaka warsa.
5. Ring sipengnyané (Nyepi) tanggal ping pisan sasih Waicaka (Kadasa) krama kapatutang nglaksanayang catur brata panyepian minakadi :
 - ha. Amati Geni, tan wénten maapi-api sekala niskala.
 - na. Amati Karya, tan wénten nyambut karya utawi gaé.
 - ca. Amati Lelungan, tan wénten malelungaan.
 - ra. Amati lelanguan, tan wénten maoneng-onengan, jejudén miwah ngwéntenang suwara gora, punika kalaksanayang arahina lan awengi.
6. Bénjang semengné tanggal ping kalih sasih Kadasa malarapan suwaraning kul-kul Balé Agung utawi désa utawi banjar nglukar brata yoga semadi, kalanturang antuk upacara sima krama (dharma santi) manut pararem.

7. Prajuru patut niténin tur nuntun saha midabdabin mangda désané sida trepti ring rahina sipeng nglaksanayang catur brata panyepian sakadi ring ajeng tur katiténin antuk Pacalang utawi jaga baya. Sang mamurug patut kadanda gung arta manut pararem.

SARGA V

SUKERTA TATA PAWONGAN

Palet 1

INDIK PAWIWAHAN

Pawos 49

1. Pawiwahan inggih punika patemoning purusa kalawan pradana malarapan panunggalan kayun suka cita kadulurin upasaksi sekala lan niskala.
2. Pamargin pawiwahan luiré :
 - ha. Mapadik, kamenggala antuk pakrunaan riin.
 - na. Ngrorod (marangkat dumun wawu majangkepan).
 - ca. Nyeburin utawi kabawos nyentana, sadurung kaupasaksiang ring prajuru patut katimbangang ring kadang warga risampun adung tur sami ingkup wawu kaupasaksian saha kapitegepin upacara-upakara pamerasan.
3. Pidabdab sang pacang marabian patut :
 - ha. Nganutang yusa, sakirang-kirang ipun sampun munggah deha teruna (19 warsa).
 - na. Sangkaning pada rena utawi suka cita.
 - ca. Manut kecaping agama utawi tan gamia gamana lan salantur ipun.
 - ra. Pradé pangambilé tios agama kamenggala antuk upakara banten panyambutan utawi masepuh (panyudiwadani).
4. Pamargin pawiwahan inucap mangda nganutin uger-uger saking guru wisésa.
5. Sinalih tunggil krama yan wénten kula wargannyané istri kawarangang sangkaning kalilayang (ngrorod), kapadik utawi kajangkepan, maletan aselid patut masadok ring Kelihan Banjarnyané.
6. Kelihan Banjar patut nuréksa tur negteg.

Pawos 50

1. Krama sané nampi krama ngrorod patut premangkin masadok ring Kelihan Banjar.
2. Kelihan patut digelis nuréksa tur netes sang ngrorod maka buatan marityaksayang manut utawi tan manut pamarginé ring dresta.
3. Bilih-bilih pamarginé sampun nepék ring dresta sang ngrorod miwah sané nampi polih pamikukuh pasayuban banjar minakadi kelihan miwah prajuru.
4. Pradé pamarginé tan patut ring dresta kelihan patut digelis malasang sang kinira-nira kaletahan kawéhin pasayuban ring jeron kelihan.
5. Kelihan patut digelis ngutsahayang mitahu wirang sang kaletahan.
6. Sang maséwaka sasampun kaparitetes wasta kalih umahnyané katundung saking wewidangan banjar inucap.
7. Sang nampi patut katetes, katuréksa manut ring prakertinnyané, yan saruron ring corah, nyarengin misakayang, wenang kadanda gung arta manut pararem.

Pawos 51

1. Sang maseserep sané pacang netes pangrorodan patut masadok tur nunas panuntun ring Kelihan Banjar tur kelihan patut nuréksa natasang seserep inucap jati kalawan tan jatinia patut pernah wirang sang ngrorod.
2. Yan linggihnyané jati pernah wirang, kelihan patut digelis seserep inucap kaanter kagenah sang ngrorod.
3. Sang maseserep patut tinut ring sapituduh kelihan parindikan tata cara netes pangrorodane luihé :
 - ha. Ngranjing kagenah sang ngrorod tan langkungan ring kalih diri.
 - na. Tan kéngin makta senjata utawi gegawan saka luihé.
 - ca. Tan kéngin matingkah kalih mabebawos parusiya nantang.
4. Sanapaké, kelihan patut midabdabin mangda tata cara panetesané prasida trepti, maka buatan mangda anaké istri sané ngrangkat jati-jati polih nerangang idepnyané

sakasidan ipun, lan wirang seserepé mangda polih miragiang atur anaké istri inucap, luir pidabdabé :

- ha. Anaké istri kagenahang ngraga, tan kéngin anak sios nampekin kirang ring tigang depa tur tinas ring inangé.
 - na. Kelihan nuntun nyulurang mangda sang maseserep polih mapitakén ring anaké istri inucap.
 - ca. Kelihan nyumakutayang pamekas ring sang istri mungguing dané pacang mapawéh pasayuban manut ring daging idep sang istri, yén pada arsa pangrorodané sang maseserep pacang katulak nanging yén sangkaning kapaksa sang lanang kasukserahang ring sang mawangrat.
5. Pamuputé kelihan dumogi malaksana manut ring pamutus idep anaké istri inucap.

Pawos 52

1. Sinalih tunggil krama sané pacang ngwarangang kulawargania patut masadok ring Kelihan Désa utawi Banjar sanistané tigang rahina sabané déwasa ancer pawarangané utawi pasakapané.
2. Prajuru inucap patut maritetsin pawaranggannyané pradé pamarginé sampun manut ring drestaning pawarangan kawéhin pasayuban sapatutnyané, pradé tan manut prajuru ngutsahayang nguwéhin panuntun larapan pamarginé sida manut ring tata cara.
3. Yén pawarangan inucap lémpas ring kecaping agama minakadi; gamia gamana wiadin sané kasinanggeh ngranayang terak jagat (ngletuhin) prajuru patut ngurungang pawarangané tur malasang lanang wadon inucap.
4. Pradé panuréksan ring ajeng nyihnayang sampun manut ring dresta upakarania patut kalanturang.
5. Ring panumaya upakara widi widana prajuru patut nodia maka saksi utama.
6. Prajuru patut niténin indik sulur pamargi pawarangané bilih-bilih yéning wénten indik sané mabuat minakadi; bebaktan utawi tetatadan utawi jiwa dana, sulur purusa lan pradana.
7. Kelihan Banjar mangda digelis nyuratang pawarangan inucap ring ilikita saha kabiaktayang ring paruman banjar kapungkur.
8. Sang mamurug patut kadanda gung alit manut pararem.

Pawos 53

1. Pawiwahan kabawos sampun puput wiadin sah inggih punika :
 - ha. Sampun mawidi widana sanistania biakala.
 - na. Kaupasaksi antuk prajuru adat wiadin dinas.
 - ca. Kaunggahang ring ilikita yéning sampun polih ilikita saking sang mawangrat (akta perkawinan).
 - ra. Sampun naur prabia upasaksi.
2. Parabiané sané kabawos tan patut, luiyé :
 - ha. Natab upakara utawi banten sangkaning kapaksa.
 - na. Silih sinunggil tan rawuh.
 - ca. Tan pailikita miwah tan kaupasaksi.
3. Indiké sané asapunika patut kadanda manut pararem.

Pawos 54

1. Sang sapasira ugi pacang ngwarangang kulawarga, patut masadok ring prayogia utawi prajuru, prajuru patut maritetes manut tan manut pangrorodan inucap.
2. Pamargin maparabian inucap kadi ring sor :
 - ha. Saking sané ngrorodang (purusa) patut ngwéntenang pamiluku antuk duta utawi pajati sakirang-kirang ipun kalih diri masengker arahina, sajawaning nglintang segara.
 - na. Yéning tan wénten pamiluku patut kula warga wadoné netes nganutin tata cara panetesan lan kasadokang ring sang mawangrat.
 - ca. Pamiluku utawi pasukan kalaksanayang gumentos prasida molihang rumaketing wirasa.
 - ra. Pradé bebawosan pamiluku wiadin pasukan inucap jantos ping tiga tan molihang pamutus sané malarapan rumaketing wirasa indik punika kasukserah mangda molih pamutus ring prajuru désa.

Pawos 55

1. Pamiteges pawiwahan, sang lanang tan kéngin marabi utawi ngalap rabi lintang ring adiri sajawaning wénten pasubaya utawi kalugra ring sang istri sakadi munggah ring uger uger sané kamedalang olih guru wisésa.
2. Yéning wénten anak lanang madrué bobotan antuk lokika sanggraha utawi mamitra ngalang patut kajangkepang manut dresta.
3. Patemon lanang wadu sané kasinanggeh ngletuhin jagat inggih punika :
 - ha. Drati krama (nyolong semara).
 - na. Lokika sanggraha utawi mamitra ngalang.
 - ca. Gamia gamana.
 - ra. Sajawaning sakadi munggah ring ha, na, ca, ring ajeng naler kasinanggeh ngletuhin jagat inggih punika salah timpal (masanggama ring buron).
4. Sang lumaksana sakadi munggah ring ha, na, ca, ra, pawos puniki patut kadanda lan mrayascita désa manut pararem.

Palet 2

INDIK PALAS MARABIAN

Pawos 56

1. Sang palas marabian kapatutang polih pamutus sang rumawos (Pengadilan Negeri) wantah sangkaning pasadok utawi pinunas silih sinunggil alaki-rabi malarapan sangkaning :
 - ha. Pada waneh.
 - na. Silih sinunggil lampus.
 - ca. Tan prasida rukun wiadin tan mari ngwetuang biuta.
 - ra. Silih sinunggil tan mari anyasar laku.
 - ka. Silih sinunggil cédangga utawi wangdu.
 - da. Tan sakadi kapatutan alaki-rabi.

2. Palas marabian sané sampun polih pamutus sakadi inucap ring ajeng patut kadulurin antuk upakara widi widana, masamsam ring Pura Désa utawi Balé Agung manut kecaping sastra agama.
3. Riwekas sang sampun palas marabian inucap adung malih marabian patut nglaksanayang tata cara utawi mawidi widana kadi nguni.

Palet 3

INDIK BALU

Pawos 57

1. Sang maraga balu manut pawongania kabinayang dados kekalih luihé :
 - ha. Balu wadon wit sentana rajeg.
 - na. Balu wadon kasamén.
2. Swadharmaning sang maraga balu inucap sakadi ring sor :
 - ha. Ngwisésa waris saking paguna kaya nguni bilih-bilih mula pecak wewarisan, nanging tan kuasa ngadol, nyandayang (ngadéang), makidihang sajeroning durung polih kaembasang saking sang patut ngwaris.
 - na. Kangkat meras sentana riantuk tan madrué putra nanging sadurungé patut wénten kaembasang malarapan antuk pidabdab sané becik marep ring kula warga sané pinih tampek saking purusa.
3. Balu wadon wiadin lanang (sentana) kéngin kawaliang (mulih daha / teruna) saha tan polih pah-pahan pagunakaya yéning tan pageh ring swadharmaning balu minakadi :
 - ha. Nilar kadaton tan pasadok sajeroning awarsa.
 - na. Lémpas ring swadharma pakeluwarga, tur tan prasida ngentosin solah manut ring patuduh kulawarga.
4. Yéning sang maraga balu inucap pageh ring swadharmaning balu raris katundung olih sentana (kulawarga purusa) kapatutang sang balu inucap polih pah-pahan paguna kaya.

Palet 4

INDIK SENTANA

Pawos 58

1. Munguing sané kaucap sentana minakadi :
 - ha. Prati sentana wiadin sentana rajeg.
 - na. Sentana saking peperasan.
2. Ngrajegang sentana manut dudonan, maka cihna arta brana pamerasan saha kaupasaksiang sekala lan niskala.
3. Prajuru adat / dinas patut miaktayang ring jaba jero désa mangda sang rumasa tan lila nyadokang, masengker tigang sasih sabanén pamerasan inucap, saha kalanturang ring sang rumawos (Pengadilan Negeri) mangda polih ilikita sapatut ipun.
4. Sapasira ugi pacang ngrajegang (ngidih) sentana patut masadok ring prayogia / prajuru sakirang-kirang ipun masué asasih sadurung pamerasan kalaksanayang.
5. Sasampun polih ilikita kadi ring ajeng patut digelis kasinangaskara sapatut ipun saha kaupasaksi sekala lan niskala.
6. Sané patut kaperas kaadegang sentana kadi ring sor :
 - ha. Jadma magama Hindu.
 - na. Kulawarga saking purusa kaping ajeng, yén tan wénten kéngin saking wadu pradé naler tan wénten wawu kéngin sakitaning arepnyané.

Pawos 59

1. Yéning wénten krama ngwetuwang putra / sentana patut masadok ring prajuru kaunggahang ring ilikita.
2. Yén wénten krama sané séda patut kasadokang ring prajuru.

Palet 5

INDIK WARIS

Pawos 60

1. Sané kaucap warisan inggih punika :
 - ha. Dué tengah, makadi tegal ayahan désa, sanggah / mrajan, pusaka lan sané siosan.
 - na. Pagunakaya, tadtadan / jiwa dana, lan utang piutang.
2. Sané kéngin kabawos warisan pradé :
 - ha. Wénten sané mapiturun utawi pawaris.
 - na. Wénten turunania utawi ahli waris.
 - ca. Wénten arta brana miwah tetegenan / ayah-ayahan marupa warisan.

Pawos 61

1. Kang sinanggeh ahli waris luihé :
 - ha. Prati sentana purusa.
 - na. Prati sentana utawi sentana rajeg.
 - ca. Sentana paperasan lanang / wadon.
2. Sang kaputungan (ceput) miwah tan madrué kulawarga purusa, warisannyané patut kawenangang antuk : dadia utawi manjing ka désa sasampun polih pamutus saking paruman pamucuk.

Pawos 62

1. Swadharmaning ahli waris, inggih punika :
 - ha. Nyanggra tur niténin miwah ngutsahayang tetamian saking kulawargannya, makadi ngemponin tetegenan / sanggah / pamrajan / pura kawitan / dadya miwah pura Kahyangan Tiga Désa lan saphnunggalan ipun saha ngupakara rauhing ayah-ayahannyané.
 - na. Ngabénang pawaris ngantos puput rauh ring nglinggihang.
 - ca. Naurin hutang-hutang manut panglokika.

2. Nglanturang swadharman pawaris ring pakulawarga, miwah ring désa pakraman, sakadi ayah-ayahan lan tetegenan-tetegenan sané siosan manut dresta.

Pawos 63

1. Waris kéngin kaedum utawi ngepah warisan pawaris, sasampun puput nglaksanayang pitra yajnya sakadi ring ajeng saha hutang-hutang pawaris lunas kataur.
2. Para waris polih pah-pahan pada sané marupa arta brana gunakaya saking pawaris.
3. Sinalih tunggil waris tan kapatutang polih pah-pahan pradé :
 - ha. Nilar kadaton utawi ngranjingin agama siosan.
 - na. Alpaka ring guru rupaka.

Pawos 64

1. Pawaris kéngin ngedumang arta brana pagunakayannya sakantun maurip luihé
 - ha. Malarapan antuk jiwa dana, tetatadan (bekel) ring pianak sané késah marabi.
 - na. Ngedumang pangupa jiwa.
 - ca. Ngedumang tetegenan wiadin pedum raksa pahan waris kantos pedum jumenek arep ring warisannyané.
2. Yéning sajeroning kulawarga wénten waris langkung ring adiri :
 - ha. Kawéntenang paigum indik pedum waris.
 - na. Yaning tan prasida, mangda katunasang tetimbang ring kerta désa.
 - ca. Pradé tan wénten cumpu ring panepas kerta désa, kéngin katunasang ring sang rumawos (Pengadilan Negeri), nanging yéning pateh pamutusnyané sakadi pamutus kerta désa, patut kadanda manut pararem.

SARGA VI

WICARA LAN PAMIDANDA

Palet 1

INDIK WICARA

Pawos 65

1. Sané kasinanggeh kerta désa adat inggih punika paruman pamucuk.
2. Saluir pamutus kerta désa kéngin katunasang banding ring sang rumawos (Pengadilan Negeri) olih sang keni pamidanda sajeroning kalih wuku saking pamutus inucap.
3. Sajeroning galah inucap tan kalaksanayang olih sang keni pamidanda, pamutus ring ajeng sampun kasinanggeh sah tur prasida pamutus inucap kalaksanayang.
4. Saluiring wicara sané mawiwit saking kacorahan miwah sané kasinanggeh mamurug sadaging awig-awig / paswara / sima / pararem, prajuru digelis niténin tur kasadokang ring kerta désa.
5. Wicara inucap mangda digelis kawicarayang ring paruman kerta désa.
6. Dasar pamutus wicara tan mari malarapan antuk tri pramana, minakadi; bukti, saksi, miwah ilikita.
7. Sahanan wicara tan mari katepasin antuk catur prata, inggih punika; sastra, purwa, loka, lan désa dresta.
8. Sahanan pamutus patut tan mari ngupadi kasukertan pawongan, minakadi :
 - ha. Mangda warga désané sayan uning kapastikayan wewatesan iwang kalawan patut.
 - na. Mangda sang kasisipan utawi sang kakawonang tatas uning ring kaiwangannyané.
 - ca. Sang molih (menang) mangda nénten nginggilang déwék antuk kamolihan inucap, tur mangda saking kayun lila legawa ngaksamayang tur ngampurayang sang kaiwangan inucap.

Palet 2

INDIK PAMIDANDA

Pawos 66

1. Kerta Désa wenang niwakang pamidanda ring sang mamurug awig-awig utawi sima muah pararem.

2. Pamidanda sané katiwakang mangda manut ring lingganing Catur Naya Upaya Sandhi, minakadi :
 - ha. Sama = krama désa rawuhing prajuru yan sampun keni kasisipan tan luput ring kawicarayang.
 - na. Béda = pamidanda masor-singgihan manut agung alit kasisipannyané.
 - ca. Dana = tetuek pamidanda inucap tan wénten sios wantah ngajegang kasukertan désa adat.
 - ra. Danda = sang pastika sisip tan luput ring keni pamidanda.
3. Pamidanda manut kasisipan nyané marupa :
 - ha. Arta brana.
 - na. Ayah-ayahan.
 - ca. Upacara-upakara.
 - ra. Kasepékang tur tan polih pasayuban krama.
 - ka. Kanorayang utawi kararianang makrama.
 - da. Nunas pangampura ring pasamuhan paruman pamucuk.
4. Dasar niwakang pamidanda kasulurang antuk sastra agama miwah sastra negara, pamekas Pancasila.
5. Kasisipan sané patut kadanda luihé :
 - ha. Lumaksana anyasar dharma.
 - na. Pabawos tan patut (wak parusya).

Palet 3

INDIK PAMARGIN PAMIDANDA

Pawos 67

1. Pamidanda sané marupa arta brana, manjing tur kadrué olih désa / banjar.
2. Saluir pamidanda sané katiwakang ring sang mamurug awig-awig kaungghang ring pasuara utawi pararem.

Palet 4

INDIK RERAMPAGAN

Pawos 68

1. Saluir pamidanda miwah sahanan urunan, lintang ring enem sasih tan kataur, patut kalaksanayang rerampagan sakatah pamidanda utawi urunan inucap.
2. Tata cara nglaksanayang rerampagan sakadi ring sor puniki :
 - ha. Kalaksanayang olih prajuru désa adat.
 - na. Sané karampag mangda nénten ngalangin pamargin rerampagan inucap.
 - ca. Sané karampag tan mari kaicén piteket sumangdéne sajeroning asasih brana sané karampag inucap katebus.
 - ra. Yan tan katebus ring wewanengan inucap brana punika sampun kangkat manjing tur kadrué olih désa utawi banjar.
3. Sané tan dados karampag inggih punika, brana piranti sané kaanggén ngrereh pangupa jiwa miwah sané kaanggén ngamargayang pailéh upacara-upakara agama, kalih pasikepan, manut pararem.
4. Brana rerampagan kadi ring ajeng sasampun liwat ring wanengnyané dados kaadol utawi kalélang, tur kalebihannyané patut waliang ring sang karampag.

SARGA VII

PASUARA, SIMA UTAWI PARAREM

Pawos 69

1. Désa utawi Banjar wenang ngardi pasuara, sima utawi pararem pinaka pamitegep awig-awig manut dudonan.
2. Daging pasuara, sima utawi pararem inucap nénten dados lémpas ring daging awig-awig.
3. Sané patut kaunggahang ring pasuara, sima utawi pararem minakadi :
 - ha. Indik padéwasan.
 - na. Rerincian panyacah daging awig-awig sané mabuat.
 - ca. Agung alit pamidanda miwah sané siosan sabacakan punika.

- ra. Tata sulur ngamargayang awig-awig.
- ka. Indik siosan sané nénten munggah ring awig-awig.

SARGA VIII

NGUWAH NGUWUHIN AWIG-AWIG

Pawos 70

1. Nguwah-nguwuhin awig-awig désa adat kalaksanayang olih krama désa majalaran saking paruman pamucuk.
2. Paruman inucap mangda malarapan antuk pakarsan krama désa adat.
3. Pakarsa nguwah-nguwuhin awig-awig sakadi ring ajeng kamedalang antuk paruman pamucuk.
4. Pamutus bebawos nguwah-nguwuhin awig-awig kautsahayang mangda malarapan antuk raksa-rumaksa, paras-paros miwah saling asah, saling asih miwah saling asuh.

SARGA IX

RAJA BRANA DRUÉN DÉSA

Pawos 71

1. Raja brana utawi jinah druén désa, inggih punika :
 - ha. Paturunan krama.
 - na. Jinah pamidanda.
 - ca. Dana punia utawi sarin tahun miwah sarin bebanten.
 - ra. Pamopog, pangampel, lan pananjung batu.
 - ka. Arta dana paican sang mawangrat.
 - da. Pikolih saking usaha krama désa / banjar (minakadi LPD).
 - ta. Miwah sané sios-siosan sané malarapan antuk dharma sadhana.
2. Tata titi ngamargiang usaha lan kasukertan LPD manut pararem.
3. Raja brana utawi jinah druén désa inucap nyabran warsa kasinahang ring paruman pamucuk, kalanturang ring paruman krama désa olih Bendésa Pakaraman.

Pawos 72

1. Prajuru désa nyabran warsa patut ngaryanang rerancangan prabéa pamekas indik jinah sané ngranjing miwah medal tur katunasang pamutus ring paruman.
2. Pamutus inucap ring ajeng pinaka uger-uger utawi sepat siku-siku prajuru sajeroning ngamargiang usaha-usaha désané nyabran warsa.
3. Nyabran tigang sasih prajuru pamekas bendésa pakraman patut nguningang pamargin ngénterang jinah ring paruman.

SARGA X

PAMUPUT

Pawos 73

1. Awig-awig puniki kasinanggeh Awig-awig Désa Pakraman Manggissari.
2. Awig-awig puniki kamanggehang ngawit kararemin olih krama désa.

Pawos 74

1. Sakaluir sané durung kabawos ring awig-awig puniki patut kalaksanayang manut tata cara sané sampun ketah mamargi malarapan antuk pararem.
2. Sakaluir sané wénten sadurungnyané, patut kaanutang ring sadaging awig-awig puniki.

Pawos 75

1. Awig-awig puniki ngamanggehang awig-awig sané sampun wénten tur sampun kasungkemin saha sampun kauwah-uwuhin utawi sampun kaanutang ring pakibeh jagat lan kawéntenan sané sampun ketah kamargayang ring Désa Pakraman Manggissari.
2. Ngwewehin awig-awig puniki kasungkemin ring paruman duk rahina Wraspati Paing, wuku Prangbakat, pananggal ping pat, sasih Jyéstha, Isaka warsa 1930 tanggal Maséhi 24 April 2008, ring Balé Désa Pakraman Manggissari.

3. Awig-awig puniki kalingga tanganin antuk Bendésa, kasarengin Kelihan-Kelihan Banjar, kasaksinin antuk Kelihan Banjar Dinas miwah Perbekel Désa Manggissari, saha kakukuhang antuk Bupati Kabupatén Jembrana.

3. Luir sané nglingga tanganin :

ha. Kapertama prajuru Désa

(1). Bendésa Adat Manggissari.


I NYOMAN NURATA

(2). Kelihan Banjar Manggissari


I GEĐE WIJA

(3). Kelihan Banjar Bunut Bolong


I NENGAH MÉNDRA

na. Kaping kalih Prajuru Désa Dinas maka saksi:

1). Kelihan Dinas Br. Manggissari


I PUTU GEĐE PUTRA YASA

3). Perbekel Désa Manggissari


I GUSTI NGURAH SUANDHA

2). Plt. Kelihan Dinas Br. Bunut Bolong


I MADE WIRANATA

4). Camat Pekutatan


I MADE SUTAMA, S.Sos

Nip 010 075 156

5). Bupati Jembrana


Prof. Dr. Irig I GEĐE WINASA

